

續日本紀 卷第三 文武紀三

天之真宗豐祖父天皇 文武天皇

起大寶三元年正月，盡慶雲四年六月

從四位下-行民部大輔兼左兵衛督皇太子學士
臣菅野朝臣真道等，奉敕撰

一.行賞律令撰定者

三年春正月，癸亥朔，廢朝。親王已下百官人等，拜太上天皇殯宮也。

甲子，遣正六位下-藤原朝臣-房前，于東海道。從六位上-多治比真人-三宅麻呂，于東山道。從七位上-高向朝臣-大足，于北陸道。從七位下-波多真人-余射，于山陰道。正八位上-穗積朝臣-老，于山陽道。從七位上-小野朝臣-馬養，于南海道。正七位上-大伴宿禰-大沼田，于西海道。道別錄事一人。巡省政績，申理冤枉。

丁卯，奉為太上天皇，設齋于大安、藥師、元興、弘福四寺。

辛未，新羅國遣薩韓-金福護、級韓-金孝元等，來赴國王喪也。新羅孝昭王，諱理洪。

是日，制，主禮六人，元以大舍人為之。宜准斯例蠲其課役。

壬午，詔三品-刑部親王，知太政官事。

二月，癸巳朔丁未，詔：「從四位下-下毛野朝臣-古麻呂等四人，預定律令。宜議功賞。」於是，古麻呂及從五位下-伊吉連-博德，並賜田十町，封五十戶。贈，正五位上-調忌寸-老人之男，田十町，封百戶。從五位下-伊余部連-馬養之男，田六町，封百戶。其封戶止身，田傳一世。

丙申，從七位下-茨田-足嶋、衣縫造-孔子，並賜-連姓。

癸卯，是日，當太上天皇七七。遣使四大寺及四天王、山田等卅三寺，設齋焉。

大宰史生，更加十員。

三月，壬戌朔戊辰，賜從四位下-下毛野朝臣-古麻呂，功田廿町。

辛未，詔四大寺，讀大般若經，度一百人。

丁丑，下制曰：「依令，國博士於部內及傍國取用。然溫故知新，希有其人。若傍國無人採用，則申省。然後，省選擬，更請處分。又有才堪郡司，若當郡有三等已上親者，聽任比郡。」

戊寅，信濃、上野二國，疫。給藥療之。

乙酉，以義淵法師，為僧正。

夏四月，壬辰朔癸巳，奉為太上天皇，設百口齋於御在所。

乙未，從五位下-高麗-若光，賜-王姓。

辛亥，從七位下-和氣-坂本，賜-君姓。

戊午，安藝國被略為奴婢者二百餘人，免從本籍。

閏四月，辛酉朔，大赦天下。

饗新羅客于難波館。詔曰：「新羅國使-薩浪金-福護表云：『寡君不幸，自去秋疾，以今春薨，永辭聖朝。』朕思，其蕃君雖居異域，至於覆育，允同愛子。雖壽命有終，人倫大期，而自聞此言，哀感已甚。可差使發遣弔賻。其福護等，遙涉蒼波，能遂使旨。朕矜其辛勩，宜賜以布帛。」

是日，右大臣-從二位-阿倍朝臣-御主人，薨。遣正三位-石上朝臣-麻呂等，弔賻之。

五月，辛卯朔壬辰，金福護等還蕃。

正七位上-倉垣連-子人，高祖根緒以來子孫，正七位上-私-小田，從七位上-私-比都自、長嶋，及昆弟等皆訴，得免雜戶。

癸巳，流來新羅人，付福護等，還本鄉。

己亥，令紀伊國-奈我、名草二郡，停布調獻絲。但阿提、飯高、牟漏三郡，獻銀也。

丙午，相模國疫。給藥救之。

六月，辛酉朔乙丑，以從四位上-大神朝臣-高市麻呂為，左京大夫。從五位下-大伴宿禰-男人，為大倭守。從五位上-引田朝臣-廣目，為齋宮頭，兼伊勢守。

二.出葬持統天皇

秋七月，庚寅朔甲午，詔曰：「籍帳之設，國家大信。逐時變更，詐偽必起。宜以庚午年籍為定，更無改易。」以，從五位上-大石王，為河內守。正五位下-黃文連-大伴，為山背守。從五位下-多治比真人-水守，為尾張守。從五位下-引田朝臣-祖父，為武藏守。正五位上-上毛野朝臣-男足，為下總守。正五位下-豬名真人-石前，為備前守。

以災異頻見，年穀不登，詔減京畿及大宰府管內諸國調半，并免天下之庸。

又詔五位已上，舉賢良方正之士。

壬寅，令四大寺，讀金光明經。

丙午,近江國山火,自焚。

遣使,祈雨于名山大川。

壬子,贈,從五位下-民忌寸-大火,正五位上-正六位上-高田首-新家,從五位上.並遣使弔賻.以壬申年功也。

八月,庚申朔辛酉,以從五位上-百濟王-良虞,為伊豫守。

甲子,大宰府請:「有勳位者作番直軍團,考滿之日,送於式部,一同散位,永預選敘。」許之。

九月,己丑朔辛卯,賜四品-志紀親王,近江國鐵穴。

庚戌,以從五位下-波多朝臣-廣足,為遣新羅大使。

癸丑,施僧-法蓮,豐前國野,冊町.褒醫術也。

冬十月,己未朔丁卯,任太上天皇御葬司.以二品-穗積親王,為御裝長官.從四位下-廣瀨王、正五位下-石川朝臣-宮麻呂、從五位下-豬名真人-大村,為副.政人四人,史二人,四品-志紀親王,為造御竈長官.從四位上-息長王、正五位上-高橋朝臣-笠間、正五位下-土師宿禰-馬手,為副.政人四人,史四人。

甲戌,僧隆觀,還俗.本姓-金,名-財.沙門-幸甚子也.頗涉藝術,兼知算曆。

癸未,天皇御大安殿,詔賜遣新羅使-波多朝臣-廣足、額田-人足,各衾一領,衣一襲.又,賜新羅王,錦二匹,絁冊匹。

十一月,戊子朔癸卯,太政官處分:「巡察使所記諸國郡司等,有治能者,式部宜依令稱舉.有過失者,刑部依律推斷。」

十二月,丁巳朔甲子,始皇親、五世王、五位已上子,年滿廿一已上者,錄其歷名,申送式部省。

己巳,以正五位下-路真人-夫人,為衛士督。

癸酉,從四位上-當麻真人-智德,率諸王、諸臣,奉誅太上天皇.諡曰-大倭根子天之廣野日女尊.〔日本書紀〕作-高天原廣野姬天皇。

是日,火葬於飛鳥岡。

壬午,合葬於大內山陵.與天武帝。

慶雲元年,春正月,丁亥朔,天皇御大極殿,受朝.五位已上,始坐始設榻焉。

癸巳,詔以大納言-從二位-石上朝臣-麻呂,為右大臣.無位-長屋王,授正四位上.無位-大市王、手嶋王、氣多王、夜須王、倭王、宇大王、成會王,並授從四位下.從六位上-高橋朝臣-若麻呂,從六位下-若犬養宿禰-檳榔,正六位上-穗積朝臣-山守、巨勢朝臣-久須比、大神朝臣-狛麻呂、佐伯宿禰-垂麻呂,從六位下-阿曇宿禰-蟲名,從六位上-采女朝臣-枚夫,正六位下-太朝臣-安麻呂,從六位上-阿倍朝臣-首名,從六位下-田口朝臣-益人,正六位下-笠朝臣-麻呂,從六位上-石上朝臣-豐庭,從六位下-大伴宿禰-道足、曾禰連-足人,正六位上-文忌寸-尺加,從六位下-秦忌寸-百足,正六位上-佐太忌寸-老、漆部造-道麻呂、上村主-大石、米多君-北助、王敬受,從六位上-多治比真人-三宅麻呂,正六位上-臺忌寸-八嶋,並授從五位下。

丁酉,二品-長親王、舍人親王、穗積親王,三品-刑部親王,益封各二百戶.三品-新田部親王,四品-志紀親王,各一百戶.右大臣-從二位-石上朝臣-麻呂,二千一百七十戶.大納言-從二位-藤原朝臣-不比等,八百戶.自餘,三位已下,五位已上,十四人,各有差。

壬寅,詔,御名部內親王、石川夫人,益封各一百戶。

戊申,伊勢國多氣、度會二郡,少領已上者,聽連任三等已上親。

辛亥,始停百官跪伏之禮。

二月,丙辰朔,日有蝕之。

癸亥,神祇官大宮主,入長上例。

乙亥,從五位上-村主-百濟,改賜-阿刀連姓。

三月,丙戌朔甲寅,信濃國疫.給藥療之。

夏四月,丙辰朔甲子,令鍛冶司,鑄諸國印。

庚午,以信濃國獻弓一千四百張,充大宰府。

甲戌,讚岐國飢.賑恤之。

壬午,備中、備後、安藝、阿波四國,苗損.並加賑恤。

三.神馬獻上與慶雲改元

五月,乙酉朔甲午,備前國獻神馬.西樓上慶雲見.詔,大赦天下,改元為慶雲元年.高年、老疾,並加賑恤.又免壬寅年以往大稅.及出神馬郡當年調.又親王、諸王、百官使部已上,賜祿有差.獻神馬國司守,正五位下-豬名真人-石前,進位一階.初見慶雲人,式部少丞-從七位上-小野朝臣-馬養,三階.並賜絁十疋,絲廿絢,布卅端,鍬冊口。

庚子,武藏國飢.賑恤之。

六月,乙卯朔丁巳,敕:「諸國兵士,團別分為十番,每番十日,教習武藝,必使齊整.令條以外,不得雜使.其有關須守者,隨便斟酌,令足守備。」

己未,令諸國勳七等以下身無官位者,聽直軍團續勞.上經三年,折當兩考,滿之年送式部,選同散位之例.其身材強幹,須堪時務者,國司商量充使之.年限、考第,一准所任之例。

乙丑,河內國古市郡人-高屋連-藥女,一產三男.賜絁二疋,綿二屯,布四端。

己巳,阿波國獻木連理。

丙子,奉幣祈雨于諸社。

秋七月,甲申朔,正四位下-粟田朝臣-真人,自唐國至。

初至唐時,有人來問:「何處使人?」答曰:「日本國使。」我使反問曰:「此是何州界?」答曰:「是大周楚州鹽城縣界也。」更問:「先是大唐,今稱大周,國號緣何改稱?」答曰:「永淳二年,天皇太帝崩,皇太后登位,稱號聖神皇帝,武則天也。國號大周。」問答略了,唐人謂我使曰:「亟聞,海東有大倭國,謂之君子國,人民豐樂,禮義敦行,今看使人,儀容大淨,豈不信乎?」語畢而去。

丙戌,左京職獻白鸞,下總國獻白鳥。

壬辰,以時雨不降,遣使祈雨於諸社。

庚子,公廩祿給式部省,大學、散位等寮。

壬寅,詔:「京師高年八十已上者,咸加賑恤。」

甲辰,奉幣帛于住吉社。

乙巳,贈從五位上-坂合部宿禰-唐,正五位下,右大臣-從二位-阿倍朝臣-御主人功封百戶,四分之一,傳子-從五位上-廣庭,贈從五位上-高田首-新家功封卅戶,四分之一,傳子-無位-首名。

八月,甲寅朔丙辰,遣新羅使-從五位上-波多朝臣-廣足等,至自新羅。

戊午,伊勢、伊賀二國,蝗。

辛巳,周防國大風,拔樹傷秋稼。

冬十月,癸丑朔丁巳,有詔,以水旱失時,年穀不稔,免課役并當年田租。

辛酉,粟田朝臣-真人等,拜朝。

正六位上-幡文通,為遣新羅大使。

戊辰,幡文通,賜造姓。

十一月,癸未朔癸巳,設太上天皇百七齋于諸寺。

庚寅,遣從五位上-忌部宿禰-子首,供幣帛、鳳凰鏡、窠子錦于伊勢大神宮。

丙申,改從四位下-引田朝臣-宿奈麻呂姓,賜阿倍朝臣。

賜正四位下-粟田朝臣-真人,大倭國田廿町,穀一千斛,以奉使絕域也。

四.定藤原宮地與國內久旱

壬寅,始定藤原宮地,宅入宮中百姓一千五百五烟,賜布有差。

十二月,壬子朔辛酉,供幣帛于諸社。

辛未,大宰府言:「去秋大風,拔樹傷年穀。」

是年夏,伊賀、伊豆二國,疫,並給醫藥療之。

二年春正月,壬午朔丙申,賜宴文武百寮于朝堂。

庚子,無位-安八萬王,授從四位下。

三月,庚辰朔癸未,車駕幸倉橋離宮。

丙戌,正四位下-豐國女王,卒。

夏四月,庚戌朔壬子,詔曰:「朕以菲薄之躬,託于王公之上,不能德感上天,仁及黎庶,遂令陰陽錯謬,水旱失時,年穀不登,民多菜色,每念於此,惻怛於心,宜令五大寺,讀金光明經,為救民苦,天下諸國,勿收今年舉稅之利,并減庸半。」

甲寅,遣使巡省天下諸國。

庚申,賜三品-刑部親王,越前國野一百町。

丙寅,敕:「依官員令,大納言四人,職掌既比大臣,官位亦超諸卿,朕顧念之,任重事密,充員難滿,宜廢省二員為定兩人,更置中納言三人,以補大納言不足,其職掌,敷奏,宣旨,待問,參議,其官位、料祿,准令商量施行。」太政官議奏:「其職近大納言,事關機密,官位、料祿,不可便輕,請其位擬正四位上,別封二百戶,資人卅。」奏可之。

先是,諸國采女肩巾田,依令停之,至是,復舊焉。

辛未,天皇御大極殿,以正四位下-粟田朝臣-真人、高向朝臣-麻呂,從四位上-阿倍朝臣-宿奈麻呂三人,為中納言,從四位上-中臣朝臣-意美麻呂,為左大辨,從四位下-息長真人-老,為右大辨,從四位上-下毛野朝臣-古麻呂,為兵部卿,從四位下-巨勢朝臣-麻呂,為民部卿。

給大宰府飛驒鈴八口,傳符十枚,長門國,鈴二口。

五月,己卯朔丙戌,三品-忍壁親王,薨,遣使監護喪事,天武天皇之第九皇子也。

丁亥,以正五位下-大伴宿禰-手拍,為尾張守。

癸卯,幡文造通等,自新羅至。

六月,己酉朔乙亥,奉幣帛于諸社,以祈雨焉。

丙子,太政官奏:「比日亢旱,田園燠卷,雖久雩祈,未蒙嘉澍,請遣京畿內淨行僧等祈雨,及罷出市廛,閉塞南門。」奏可之。

秋七月,戊寅朔丙申,大納言-正三位-紀朝臣-麻呂,薨,近江朝御史大夫-正三位-大人之子也。

丙午,大倭國大風,損壞百姓廬舍。

八月,戊申朔戊午,詔曰:「陰陽失度,炎旱彌旬,百姓飢荒,或陷罪網,宜大赦天下,與民更新,死罪已下,罪無輕重,咸赦除之,老病、鰥寡惻獨,不能自存者,量加賑恤,其八虐,八虐者,謀反、謀大逆、謀判、惡逆、不道、大不敬、不孝、不義也,常赦所不免,不在赦限,又,免諸國調之半。」

又,授遣唐使-粟田朝臣-真人,從三位,其使下人等,進位賜物,各有差。

以從三位-大伴宿禰-安麻呂,為大納言,從四位下-美努王,為攝津大夫。

九月,戊寅朔壬午,詔二品-穗積親王,知太政官事。

丙戌,置八咫烏社于大倭國宇太郡,祭之。

丁酉,以從五位上-當麻真人-櫻井,為伊勢守.
癸卯,越前國獻赤烏.國司并出瑞郡司等,進位一階.百姓,給復一年.獲瑞人六人臣-國持,授從八位下.並賜繩、綿、布、鍬,各有差.
冬十月,丁未朔壬申,詔遣使於五道.除山陽西海道.賑恤高年,老疾鰥寡惇獨,并免當年調之半.
丙子,新羅貢調使-一吉漡-金儒吉等,來獻.
十一月,丁丑朔己卯,以正四位上-小野朝臣-毛野,為中務卿.
庚辰,從五位下-當麻真人-楯,為齋宮頭.
有詔,加親王、諸王臣食封,各有差.先是,五位有食封.至是,代以位祿也.
己丑,徵發諸國騎兵.為迎新羅使也.以正五位上-紀朝臣-古麻呂,為騎兵大將軍.
甲辰,以大納言-從三位-大伴宿禰-安麻呂,為兼大宰帥.從四位下-石川朝臣-宮麻呂,為大貳.

五.重令髮制與大射祿法

十二月,丁未朔乙卯,都下諸寺,權施食封,各有差.
乙丑,令天下婦女,自非神部,齋宮宮人及老嫗,皆髻髮.語在前紀,至是重制也.
丙寅,正四位上-葛野王,卒.
癸酉,無位-山前王,授從四位下.丹波王、阿刀王,並從五位下.正六位上-三國真人-人足、藤原朝臣-武智麻呂,正六位下-多治比真人-夜部、佐味朝臣-笠麻呂、藤原朝臣-房前,從六位上-中臣朝臣-石木、狛朝臣-秋麻呂、坂本朝臣-阿曾麻呂、多治比真人-縣守、阿倍朝臣-安麻呂,從六位下-波多朝臣-廣麻呂、佐伯宿禰-男、阿倍朝臣-真君、田口朝臣-廣麻呂、巨勢朝臣-子祖父、紀朝臣-男人,正七位上-大伴宿禰-大沼田,正六位上-坂合部宿禰-三田麻呂,從六位下-縣犬養宿禰-筑紫,正六位上-坂上忌寸-忍熊、船連-秦勝,從六位下-美努連-淨麻呂,並從五位下.
是日,新羅使金儒吉等入京.
是年,諸國甘飢疫,並加醫、藥,賑恤之.
三年春正月,丙子朔,天皇御大極殿受朝.新羅使-金儒吉等在列.朝廷儀衛,有異於常.
己卯,新羅使貢調.
壬午,饗金儒吉等于朝堂,奏諸方樂于庭.敘位賜祿,各有差.
丁亥,金儒吉等還蕃,賜其王敕書:「天皇敬問新羅王.使人一吉漡金儒吉、薩漡金今古等至,所獻調物並具之.王有國以還,多歷年歲.所貢無虧,行李相屬.款誠既著,嘉尚無已.春首猶寒,比無恙也.國境之內,當並平安.使人今還,指宣注意并寄土物如別.」
壬辰,定大射祿法.親王二品、諸王臣二位,一箭中外院布廿端,中院廿五端,內院卅端.三品、四品、三位,一箭中外院布十五端,中院廿端,內院廿五端.四位,一箭中外院布十端,中院十五端,內院廿端.五位,一箭中外院布六端,中院十二端,內院十六端.其中皮者,一箭同布一端.若外、中、內院及皮重中者倍之.六位、七位,一箭中外院布四端,中院六端,內院八端.八位、初位,一箭中外院布三端,中院四端,內院五端.中皮者,一箭布半端.若外、中、內院,及皮重中者如上.但勳位者不著朝服,立其當位次.
閏正月,丙午朔庚戌,以從五位上-豬名真人-大村,為越後守.
京畿及紀伊、因幡、參河、駿河等國,並疫.給醫藥療之.
是日,令掃淨諸佛寺并神社.亦索捕盜賊.
戊午,奉新羅調於伊勢太神宮及七道諸社.
敕:「收貯大藏諸國調者,令諸司每色檢校相知.又收貯民部諸國庸中輕物,繩、絲、綿等類.自今以後,收於大藏,而支度年料,分充民部也.」
乙丑,敕,令禱祈神祇.由天下疫病也.
癸酉,泉內親王參于伊勢大神宮.
二月,乙亥朔庚辰,左京大夫-從四位上-大神朝臣-高市麻呂,卒.以壬申年功,詔贈從三位.大花上-利金之子也.
辛巳,知太政官事二品-穗積親王季祿,,准右大臣給之.
戊子,以從五位下-阿倍朝臣-首名,為大宰少貳.
山背國相樂郡女-鴨首-形名,三產六兒,初產二男,次產二女,後產二男.其初產二男,有詔為大舍人.

六.制定七條事

庚寅,河內、攝津、出雲、安藝、紀伊、讚岐、伊豫七國,飢.並賑恤之.
詔曰:「准令,三位以上已在食封之例,四位以下寔有位祿之物.又四位有飛蓋之貴,五位無冠蓋之重.不應有蓋、無蓋,同在位祿之列.故四位宜入食封之限.又案令,諸王、諸臣位封,自正一位三百戶差降,止從三位一百戶.冠位已高,食封何薄?宜正一位六百戶差降,止從四位八十戶.」

又,制七條事:

- 准令,諸長上官遷代,皆以六考為限,色別加二考,以十二考為選限.百官得選之限太遠.宜色別減二考,各定選限.其一.
- 准令,籍蔭入選,雖有出身之條,未明豫選之式.自今以後,取蔭出身,非因貢舉及別敕處分,並不在常選之限.其二.
- 准律令,於律雖有除名之人六載之後聽敘之文,令內未載除名之罪限滿以後應敘之式.宜議作應敘之條.其三.
- 准令,京及畿內人身輪調.於諸國減半.宜罷人身之布,輪戶別之調.乃異外邦之民,以優內國之口.輪調之式,依一戶之丁,制四等之戶.輪調多少,議作條例.其四.
- 准令,正丁歲役收庸布二丈六尺.當欲輕歲役之庸,息人民之乏.並宜減半.其大宰所部,皆免收庸.若公作之役,不足備力者,商量作安穩條例,永為法式.其五.
- 准令,一位以下及百姓、雜色人等,皆取戶粟,以為義倉.是義倉之物,給養窮民,預為儲備.今取貧戶之物,還給乏家之人,於理不安.自今以後,取中中以上戶之粟,以為義倉,必給窮乏,不得他用.若官人私犯,一斗以上,即日解官,隨贓決罰.其六.
- 准令,五世之王,雖得王名,不在皇親之限.今五世之王,雖有王名,已絕皇親之籍,遂入諸臣之例.顧念親親之恩,不勝絕籍之痛.自今以後,五世之王,在皇親之限.其承嫡者,相承為王.自餘如令.其七.

七.敕書新羅與議定遷都

丙申,授船號-佐伯,從五位下.入唐執節使-從三位-粟田朝臣-真人之所乘者也.佐伯,船名也.授船位階者,亦見於『續日本紀』天平實字二年三月、同七年八月、『續日本後紀』承和四年五月等條.

丁酉,車駕幸內野.

己亥,五世王朝服,依格始著淺紫.

庚子,京及畿內盜賊滋起,因差強幹人,悉令逐捕焉.

是日,甲斐、信濃、越中、但馬、土佐等國一十九社,始入祈年幣帛例.其神名,具神祇官記.

三月,甲辰朔丙辰,右京人日置須太賣,一產三男.賜衣糧并乳母.

丁巳,詔曰:「夫禮者,天地經義,人倫鎔範也.道德仁義,因禮乃弘,教訓正俗,待禮而成.比者,諸司容儀,多違禮義,加以,男女無別,晝夜相會.又如聞:『京城內外,多有穢臭.』良由所司不存檢察.自今以後,兩省、五府,並遣官人及衛士,嚴加捉搦,隨事科決.若不合與罪者,錄狀上聞.」又詔曰:「軒冕之群,受代耕之祿,有秩之類,無妨於民農.故召伯所以憩甘棠,公休由其拔園葵.頃者,王公、諸臣,多占山澤,不事耕種,競懷貧婪,空妨地利.若有百姓採柴草者,仍奪其器,令大辛苦.加以被賜地,實止有一二畝.由是踰峰跨谷,浪為境界.自今以後,不得更然.但氏氏祖墓及百姓宅邊,栽樹為林,并周二三十許步,不在禁限.」

夏四月,甲戌朔壬寅,河內、出雲、備前、安藝、淡路、讚岐、伊豫等國,飢疫.遣使賑恤之.

五月,癸卯朔丁巳,河內國石河郡人-河邊朝臣-乙麻呂,獻白鳩.賜緇五疋,絲十絢,布廿端,鍬廿口,正稅三百束.

六月,癸酉朔,日有蝕之.

丙子,令京畿祈雨于名山大川.

丙申,從四位下-與射女王卒.

秋七月,壬寅朔壬子,以從四位上-巨勢朝臣-太益須,為式部卿.

辛酉,以從五位下-笠朝臣-麻呂,為美濃守.

乙丑,丹波、但馬二國,山火.遣使奉幣帛于神祇.即雷聲忽應,不撲自滅.

大倭國宇智郡狹嶺,山火.撲滅之.

戊辰,以從五位下-阿倍朝臣-真君,為大倭守.

己巳,周防國守-從七位下-引田朝臣-秋庭等,獻白鹿.

諸國飢.遣使於六道,除西海道,並賑恤之.

大宰府言:「所部九國、三嶋,亢旱大風,拔樹損稼.」遣使巡省.因免被災尤甚者調役.

八月,壬申朔甲戌,越前國言:「山災不止.」遣使,奉幣部內神,救之.

壬辰,以從五位下-美努連-淨麻呂,為遣新羅大使.

庚子,遣三品-田形內親王,侍于伊勢大神宮.

九月,壬寅朔甲辰,以從五位下-坂合部宿禰-三田麻呂,為三河守.

丙辰,遣使七道,始定田租法.町十五束.及點役丁.

丙寅,行幸難波.

冬十月,辛未朔壬午,還宮.

攝津國造-從七位上-凡河內忌寸-石麻呂、山背國造-外從八位上-山背忌寸-品遲、從八位

上-難波忌寸-濱足、從七位下-三宅忌寸-大目,合四人各進位一階。

乙酉,從駕諸國騎兵六百六十人,皆免庸調并戶內田租。

十一月,辛丑朔癸卯,賜新羅國王敕書曰:「天皇敬問新羅國王.朕以虛薄,謬承景運.慚無練石之才,徒奉握鏡之任.日旰忘飧,翼翼之懷愈積,宵分輟寢,業業之想彌深.冀覃覆載之仁,遐被寰區之表.況王世居國境,撫寧人民,深秉並舟之至誠,長脩朝貢之厚禮.庶磐石開基,騰茂響於麤岫,維城作固,振芳規於鴈池.國內安樂,風俗淳和.寒氣嚴切,比如何也.今故遣大使-從五位下-美努連-淨麻呂,副使-從六位下-對馬連-堅石等,指宣往意.更不多及。」

戊申,從五位下-大市王,為伊勢守。

十二月,辛未朔,日有蝕之。

丙子,遣四品-多紀內親王,參于伊勢大神宮。

己卯,有敕,令天下脫脛裳,一著白袴。

是年,天下諸國疫疾,百姓多死.始作土牛大儺。

四年,春正月,此條闕錄,逸歟。

二月,庚午朔乙亥,因諸國疫,遣使大祓。

戊子,詔諸王臣五位已上,議遷都事也。

八.宣命次詔、文武崩御

辛卯,主稅寮助-從六位上-掠垣直-子人,賜-連姓。

甲午,天皇御大極殿,詔授成選人等位.親王已下五位已上男女一百十人,各有差.又授無位-直見王,從六位上-紀朝臣-諸人,從六位下-高向朝臣-色夫智、小治田朝臣-安麻呂、小治田朝臣-宅持、上毛野朝臣-堅身,正七位下-高橋朝臣-上麻呂,從六位下-中臣朝臣-人足、平群朝臣-安麻呂,正六位上-高志連-村君、國覓忌寸-八嶋、幡文造-通,並授從五位下。

三月,己亥朔庚子,遣唐副使-從五位下-巨勢朝臣-邑治等,自唐國至。

庚申,從四位上-下毛野朝臣-古麻呂,請改下毛野朝臣石代姓為-下毛野川內朝臣.許之.或本云-從四位上.依慶雲二年四月辛未條與和銅元年三月丙午條,當為從四位下.所謂從四位上,謬乎。

甲子,給鐵印于攝津、伊勢等廿三國,使印牧駒犢。

夏四月,戊辰朔庚辰,以日並知皇子命薨日,始入國忌。

壬午,詔曰:「天皇詔旨敕久,汝藤原朝臣乃仕奉狀者,今乃未爾不在.掛母畏支天皇御世御世仕奉而,今母又,朕卿止為而,以明淨心而,朕乎助奉仕奉事乃,重支勞支事乎所念坐御意坐爾依而,多利麻比氏夜夜彌賜問婆,忌忍事爾似事乎志奈母,常勞彌重彌所念坐久,止宣.又難波大宮御宇掛母畏支天皇命乃,汝父-藤原大臣乃仕奉賈流狀乎婆,建內宿禰命乃仕奉賈流事止同事敕止救而,治賜慈賜賈利.是以令文所載多流乎跡止為而,隨令長遠久,始今而次次被賜將往物敘止,食封五千戶賜久止救命聞宣。」辭而不受.減三千戶賜二千戶,一千戶傳于子孫。

又詔,益封親王已下四位已上,及內親王、諸王、嬪、命婦等,各有差。

丙申,天下疫飢.詔加振恤.但丹波、出雲、石見三國尤甚.奉幣帛於諸社.又,令京畿及諸國寺讀經焉。

賜正六位下-山田史-御方,布、鈿、鹽、穀.優學士也。

五月,戊戌朔己亥,兵部省,始錄五衛府五位以上朝參及上日,申送太政官。

乙巳,以正五位下-多治比真人-水守,為河內守。

壬子,給從五位下-巨勢朝臣-邑治,從七位上-賀茂朝臣-吉備麻呂,從八位下-伊吉連-古麻呂等,綿、緇、布、鈿,并穀,各有差.並以奉使絕域也。

癸丑,美濃國言:「村國連等志賣,一產三女。」賜穀卅斛,乳母一人。

戊午,畿內霖雨損苗.遣使賑貸之。

癸亥,讚岐國那賀郡-錦部-刀良,陸奧國信太郡-生王-五百足,筑後國山門郡-許勢部-形見等,各賜衣一襲及鹽、穀.初救百濟也.官軍不利.刀良等被唐兵虜,沒作官戶,歷卅餘年乃免.刀良,至是遇我使粟田朝臣-真人等,隨而歸朝.憐其勤苦,有此賜也。

乙丑,從五位下-美努連-淨麻呂及學問僧義法、義基、惣集、慈定、淨達等,至自新羅。

六月,丁卯朔,日有蝕之。

辛巳,天皇崩.遺詔:「舉哀三日,凶服一月。」按親王喪之禮。

壬午,以三品-志紀親王,正四位下-犬上王,正四位上-小野朝臣-毛野,從五位上-佐伯宿禰-百足,從五位下-黃文連-本實等,供奉殯宮事.舉哀,著服,一依遺詔行之.自初七至七七,於四大寺設齋焉。

冬十月,乙丑朔丁卯,以二品-新田部親王、從四位上-阿倍朝臣-宿奈麻呂、從四位下-佐伯宿禰-太麻呂、從五位下-紀朝臣-男人,為造御電司.從四位上-下毛野朝臣-古麻呂、正五位上-土師宿禰-馬手、正五位下-民忌寸-比良夫、從五位上-石上朝臣-豐庭、從五位下-藤原朝臣-房前,為造山陵司.正四位下-犬上王,從五位上-采女朝臣-枚夫、多治比真人-三宅麻呂,從五位下-黃文連-本實、米多君-北助,為御裝司。

十一月,乙未朔丙午,從四位上-當麻真人-智德,率誅人,奉誅.諡曰-倭根子豐祖父天皇。

即日,火葬於飛鳥岡。

甲寅,廿日.奉葬於檜隈安古山陵。

